



Broj/Број: 01/7, 02/3-50-1-188-2-11/05  
Sarajevo/Сарајево: 14.9.2005.

|                       |      |        |            |
|-----------------------|------|--------|------------|
| Primljeno: 09.10.2005 |      |        |            |
| Org. jed.             | Broj | Prilog | Vrijednost |
|                       |      |        |            |

### ZAPISNIK

sa 11-e zajedničke sjednice Komisije za finansijske i administrativne poslove Doma naroda i Administrativne komisije Predstavničkog doma Parlamentarne skupštine Bosne i Hercegovine, održane u Sarajevu dana 14.9.2005.godine, s početkom u 10 sati

**PRISUTNI ČLANOVI KOMISIJE ZA FINANSIJSKE I ADMINISTRATIVNE POSLOVE DOMA NARODA:** Ruža Stojanović, Osman Brka, Branko Zrno, Mustafa Pamuk, Velimir Jukić i Goran Milojević koji je došao na sjednicu u toku tačke AD-3 dnevnog reda.

**PRISUTNI ČLANOVI ADMINISTRATIVNE KOMISIJE PREDSTAVNIČKOG DOMA:** Senija Kapetanović, Dušanka Majkić, Hazim Felić, Jozo Križanović, Mladen Potočnik, Mubera Ušanović, Momčilo Novaković, koji je zakasnio na sjednicu, i Vinko Zorić, koji je došao na sjednicu u toku tačke AD-2 dnevnog reda.

**ODSUTNI ČLANOVI ADMINISTRATIVNE KOMISIJE PREDSTAVNIČKOG DOMA:** Ruža Sopta.

**OSTALI PRISUTNI:** Sekretar Zajedničke službe Sekretarijata Parlamentarne skupštine Bosne i Hercegovine Aljoša Čampara, sekretar Doma naroda Parlamentarne skupštine Bosne i Hercegovine Jadranko Tomić, sekretar Predstavničkog doma Parlamentarne skupštine Bosne i Hercegovine Branka Todorović, šef Računovodstva Parlamentarne skupštine Bosne i Hercegovine Jadranka Korać, ispred Ureda za reviziju poslovanja institucija BiH: Samir Mušović, zamjenik generalnog revizora, i Munevera Bavić, viši revizor, iz Službe za zajedničke poslove institucija BiH: Simo Janković direktor Službe za zajedničke poslove institucija BiH, i Dragica Knežević, šef Odjela za pravne i opće poslove Službe za zajedničke poslove institucija BiH, ispred Ministarstva finansija i trezora BiH Ranko Šakota, pomoćnik ministra, Alma Tajčić, volonter u Sekretarijatu Parlamentarne skupštine Bosne i Hercegovine.

Za sjednicu je predložen

### DNEVNI RED

1. Usvajanje Zapisnika 10-e zajedničke sjednice;

2. Izvještaj o izvršenju budžeta za period januar-juni 2005. godine;
3. Izvještaj Ureda za reviziju o reviziji Parlamentarne skupštine BiH za 2004. godinu;
4. Razmatranje Prijedloga Odluke o organizaciji Sekretarijata Parlamentarne skupštine Bosne i Hercegovine;
5. Odgovor Kolegija Sekretarijata Parlamentarne skupštine Bosne i Hercegovine po zaključku Komisija;
6. Odgovor Vijeća ministara BiH na zaključak o utvrđivanju regresa za 2005. godinu;
7. Prijedlog Odluke o izmjenama i dopunama Odluke o utvrđivanju kompleksa zgrada i zemljišta za smještaj institucija Bosne i Hercegovine, o njihovom statusu, uvjetima i načinu korištenja;
8. Razmatranje prijedloga Nikole Špirića za dopunu člana 52. Pravilnika o načinu i uslovima korištenja internih i eksternih usluga - reprezentacije, PTT usluga, službenog vozila, službene odjeće, štampe i stručne literature u Parlamentarnoj skupštini Bosne i Hercegovine.
9. Razno

Jedanaestu zajedničku sjednicu Komisije za finasijske i administrativne poslove Doma naroda i Administrativne komisije Predstavničkog doma Parlamentarne skupštine Bosne i Hercegovine otvorila je Ruža Stojanović, predsjedavajuća Komisije za finasijske i administrativne poslove Doma naroda. Pošto je konstatirala da postoji kvorum, predložila je dnevni red jedanaeste zajedničke sjednice i pozvala prisutne da se o njemu izjasne. Pošto nije bilo primjedbi, predloženi dnevni red prisutni članovi Komisija usvojili su jednoglasno.

**AD-1** Zapisnik 10-e zajedničke sjednice Komisije za finasijske i administrativne poslove Doma naroda i Administrativne komisije Predstavničkog doma Parlamentarne skupštine Bosne i Hercegovine usvojen je sa 10 glasova ZA i 1 glasom UZDRŽAN.

**AD-2** Uvodno izlaganje o ovoj tački dnevnog reda dala je Ruža Stojanović predsjedavajuća zajedničkom sjednicom Komisija. Dodatno obrazloženje uz ovu tačku dnevnog reda dala je Jadranka Korać, šef Računovodstva Parlamentarne skupštine Bosne i Hercegovine.

U raspravi o ovoj tački dnevnog reda učestvovali su: Ruža Stojanović, Dušanka Majkić, Jadranka Korać, Aljoša Čampara, Senija Kapetanović, Velimir Jukić, Mladen Potočnik i Osman Brka.

Nakon rasprave o ovoj tački dnevnog reda, prisutni članovi Komisija jednoglasno su usvojili sljedeće zaključke

#### ZAKLJUČAK I

Prima se k znanju Izvještaj o izvršenju budžeta za period januar-juni 2005. godine.

#### ZAKLJUČAK II

Obavezuju se svi nosioci funkcija koji utiču na stvaranje troškova u Parlamentarnoj skupštini Bosne i Hercegovine da u roku od pet dana od dana prijema ovog zaključka dostave Računovodstvu Parlamentarne skupštine Bosne i Hercegovine ulazne parametre potrebne za što preciznije planiranje svih pozicija i izradu projekcije Budžeta za 2006. godinu.

Svi oni koji u datom roku ne dostave ulazne parametre za izradu projekcije Budžeta za 2006. godinu snosit će odgovornost za nepotpuno planiranje, odnosno nedostatak sredstava za namjene koje nisu planirane.

### ZAKLJUČAK III

Zadužuje se Računovodstvo Parlamentarne skupštine Bosne i Hercegovine da do naredne sjednice Komisije za finansijske i administrativne poslove Doma naroda i Administrativne komisije Predstavničkog doma Parlamentarne skupštine Bosne i Hercegovine sačini analizu troškova do kraja godine na osnovu koje bi se utvrdio iznos nedostajućih sredstava kako bi se utvrđena razlika mogla na vrijeme tražiti iz sredstava rezervi.

Na osnovu pokazatelja iz stava 1. ovog zaključka, predsjedavajući Komisije za finansijske i administrativne poslove Doma naroda i Administrativne komisije Predstavničkog doma Parlamentarne skupštine Bosne i Hercegovine zakazat će se sastanak s Vijećem ministara BiH na kojem će razgovarati o korištenju sredstava rezervi.

**AD-3** Uvodno izlaganje o ovoj tački dnevnog reda dala je Ruža Stojanović. Nakon uvodnog izlaganja, u raspravi su učestvovali: Momčilo Novaković, Majkić Dušanka u toku čije diskusije je sjednicu, po odobrenju predsjedavajuće, napustio Jozo Križanović, Jadranka Korać, Senija Kapetanović, Samir Mušović, Munevera Bavtić koja je, između ostalog, zatražila da se zapisnički konstatira da revizija smatra da u revizorskom Izvještaju za 2004. godinu treba da stoji primjedba da je potrebno donijeti zakon kojim bi se uredile plaće i druge naknade članova Parlamentarne skupštine Bosne i Hercegovine, Mubera Ušanović, Vinko Zorić, Mladen Potočnik i Mustafa Pamuk.

Nakon rasprave o ovoj tački dnevnog reda, prisutni članovi Komisija jednoglasno su usvojili sljedeće zaključke

### ZAKLJUČAK I

Administrativna komisija Predstavničkog doma i Komisija za finansijske i administrativne poslove Doma naroda Parlamentarne skupštine Bosne i Hercegovine u skladu s mišljenjem Ureda za reviziju od 14.9.2005. godine, iznesenim na 11. zajedničkoj sjednici Administrativne komisije Predstavničkog doma i Komisije za finansijske i administrativne poslove Doma naroda Parlamentarne skupštine Bosne i Hercegovine, da pitanje prava i dužnosti članova Parlamentarne skupštine Bosne i Hercegovine treba biti uređeno zakonom ponovo traže da se ubrzaju aktivnosti na donošenju Zakona o plaćama i ostalim naknadama budžetskih korisnika na nivou Bosne i Hercegovine.

### ZAKLJUČAK II

Zadužuju se stručne službe Parlamentarne skupštine Bosne i Hercegovine da ubrzaju rad na donošenju Pravilnika o internoj kontroli i reviziji u Parlamentarnoj skupštini Bosne i Hercegovine.

### ZAKLJUČAK III

Zadužuju se stručne službe Parlamentarne skupštine Bosne i Hercegovine da naprave Elaborat programa posebne namjene - Evropske integracije i drugi oblici međunarodne saradnje Parlamentarne skupštine Bosne i Hercegovine.

Elaborat programa posebne namjene potrebno je dostaviti Komisiji za finansijske i administrativne poslove Doma naroda i Administrativnoj komisiji Predstavničkog doma

Parlamentarne skupštine Bosne i Hercegovine na razmatranje prije projekcije Budžeta za 2006. godinu.

#### ZAKLJUČAK IV

Komisija za finansijske i administrativne poslove Doma naroda i Administrativna komisija Predstavničkog doma Parlamentarne skupštine Bosne i Hercegovine razmatrajući Izvještaj Ureda za reviziju poslovanja Parlamentarne skupštine Bosne i Hercegovine za 2004. godinu nisu mogle dati svoje mišljenje o tački 3.2.2. – Norveška pomoć Parlamentu jer nemaju nikakvih podataka o donacijama, niti su bile informirane o njihovoj realizaciji u skladu s utvrđenim nadležnostima kao jedine mjerodavne za praćenje realizacije Budžeta Parlamentarne skupštine Bosne i Hercegovine.

Komisije pitaju Kolegij Sekretarijata Parlamentarne skupštine Bosne i Hercegovine: zašto ih je, u okvirima utvrđenih nadležnosti za razmatranje izvještaja o trošenju donatorskih sredstava, zaobišao i zašto se direktno u dosadašnjoj praksi obraćao kolegiju domova?

#### ZAKLJUČAK V

Komisija za finansijske i administrativne poslove Doma naroda i Administrativna komisija Predstavničkog doma Parlamentarne skupštine Bosne i Hercegovine nisu bile informirane od stručnih službi Sekretarijata Parlamentarne skupštine Bosne i Hercegovine da je Ured za reviziju dostavio Nacrt izvještaja o obavljenoj reviziji za 2004. godinu, na koji ispred Parlamentarne skupštine Bosne i Hercegovine, nije upućen pisani odgovor.

Komisija za finansijske i administrativne poslove Doma naroda i Administrativna komisija Predstavničkog doma Parlamentarne skupštine Bosne i Hercegovine upozoravaju sekretara Zajedničke službe na ovaj propust, te traže da poduzme određene mjere kako bi se ovakvi i slični propusti izbjegli.

#### ZAKLJUČAK VI

Komisija za finansijske i administrativne poslove Doma naroda i Administrativna komisija Predstavničkog doma Parlamentarne skupštine Bosne i Hercegovine usvojile su Izvještaj Ureda za reviziju poslovanja institucija BiH o reviziji Parlamentarne skupštine Bosne i Hercegovine za 2004. godinu.

Komisija za finansijske i administrativne poslove Doma naroda i Administrativna komisija Predstavničkog doma Parlamentarne skupštine Bosne i Hercegovine zadužuju stručne službe Sekretarijata da pristupe otklanjanju nedostataka u skladu s primjedbama i preporukama Ureda za reviziju poslovanja institucija BiH.

**AD-4** Uvodno izlaganje o ovoj tački dnevnog reda dala je Ruža Stojanović, te obrazložila zašto je ova tačka dnevnog reda odgođena do današnje sjednice Komisija.

U raspravi o ovoj tački dnevnog reda učestvovali su: Momčilo Novaković, koji je kao predlagatelj amandmana dao i njihovo obrazloženje, te informirao prisutne da će morati napustiti sjednicu u toku ove tačke s obzirom da kasni na sastanak u OHR-u, ali se po završetku sastanka namjerava vratiti na sjednicu, Osman Brka i Ruža Stojanović, koja je predložila da se ova tačka razmatra po povratku Momčila Novakovića, a da se sad razmatraju tačke koje iza nje slijede. Ovaj prijedlog prihvaćen je jednoglasno.

Sjednicu je opravdano napustio Momčilo Novaković.

**Ad-5.** Uvodno izlaganje o ovoj tački dnevnog reda dala je predsjedavajuća sjednicom Ruža Stojanović. Dodatno pojašnjenje uz ovu tačku dnevnog reda dao je sekretar Zajedničke službe

Sekretarijata Aljoša Čampara. U raspravi o ovoj tački dnevnog reda učestvovali su: Ruža Stojanović, Velimir Jukić u toku čijeg izlaganja je sjednicu iz opravdanih razloga napustila Dušanka Majkić u 12,00 sati, Mustafa Pamuk, Vinko Zorić, Senija Kapetanović, Ranko Šakota, Branko Zrno, Davorka Čaplinski, Mladen Potočnik i Jadranka Korać.

Nakon rasprave o ovoj tački dnevnog reda, prisutni članovi Komisija jednoglasno su usvojili sljedeće zaključke

#### ZAKLJUČAK I

Komisija za finansijske i administrativne poslove Doma naroda i Administrativna komisija Predstavničkog doma Parlamentarne skupštine Bosne i Hercegovine smatraju da Ministarstvo finansija i trezora BiH nije moglo uslovljavati izvršenje odluka administrativnih komisija Parlamentarne skupštine Bosne i Hercegovine saglasnošću Agencije za državnu službu.

Komisija za finansijske i administrativne poslove Doma naroda i Administrativna komisija Predstavničkog doma Parlamentarne skupštine Bosne i Hercegovine smatraju da je Agencija za državnu službu uslovljavajući svoju saglasnost sistematizacijom radnih mjesta, morala pri razmatranju zahtjeva Sekretarijata Parlamentarne skupštine Bosne i Hercegovine za imenovanje privremenih sekretara u komisijama uzeti u obzir osnovne principe Zakona o upravi ("Sl. glasnik BiH" br. 32/02) utvrđene članom 45. navedenog zakona, te uzeti u obzir činjenicu da su komisije, kao i stalne delegacije osnovane odlukama oba doma, kojima je potrebno osigurati nesmetan rad.

#### ZAKLJUČAK II

Administrativna komisija Predstavničkog doma i Komisija za finansijske i administrativne poslove Doma naroda Parlamentarne skupštine Bosne i Hercegovine insistiraju da stručne službe Sekretarijata Parlamentarne skupštine Bosne i Hercegovine ispoštuju Odluku Komisija o odobravanju isplate naknade za rad privremeno raspoređenim sekretarima zajedničkih komisija i delegacija Parlamentarne skupštine Bosne i Hercegovine i na osnovu nje izvrše obračun naknada privremenim sekretarima koji će se dostaviti na isplatu Ministarstvu finansija i trezora BiH.

Za realizaciju ovog zaključka zadužuje se Računovodstvo Parlamentarne skupštine Bosne i Hercegovine i sekretar Zajedničke službe Sekretarijata.

**Nakon ove tačke dnevnog reda određena je pauza do 14 sati. Sjednica je nastavljena u 14,20 sati.**

**AD-4.** Nakon pauze, prisutni članovi Komisija vratili su se na tačku AD-4. Predsjedavajuća sjednicom Ruža Stojanović otvorila je raspravu o ovoj tački dnevnog reda. U raspravi su učestvovali: Momčilo Novaković, Senija Kapetanović, Aljoša Čampara, koji je dao dodatno obrazloženje uz Odluku o organizaciji Sekretarijata a u vezi sa predloženim amandmanima, Osman Brka, Mladen Potočnik, Jadranko Tomić, Branka Todorović, Velimir Jukić, Ruža Stojanović, Mustafa Pamuk i Hazim Felić.

Nakon provedene rasprave o ovoj tački dnevnog reda, prisutni su jednoglasno

#### ZAKLJUČILI

Ova tačka dnevnog reda nije završena na današnjoj raspravi, s obzirom da se o njoj nisu usaglasili prisutni članovi Komisija.

Do naredne sjednice Komisija potrebno je djelovati amandmanima kako bi se usaglasio tekst Odluke o organizaciji Sekretarijata.

Predlagač amandmana će do naredne sjednice Komisija napisati nove amandmane uzimajući u obzir stavove koji su usaglašeni na današnjoj sjednici, odnosno ona rješenja koja je bio spreman na današnjoj sjednici prihvatiti vezano za predložene amandmane.

U vezi s ovom tačkom dnevnog reda zakazuje se zajednička sjednica Komisija za 26.9.2005. godine.

**Ad-6.** Predsjedavajuća sjednicom Ruža Stojanović je u vezi s ovom tačkom dnevnog reda pozvala sekretara Administrativne komisije Predstavničkog doma Davorku Čaplinski da da uvodno izlaganje. Davorka Čaplinski upoznala je prisutne s odgovorom Vijeća ministara BiH, te poduzetim aktivnostima Komisija i činjenicama u vezi s Odlukom o regresu i pravnim osnovom na koji se pozvalo Vijeća ministara BiH. U raspravi o ovoj tački dnevnog reda učestvovali su: Hazim Felić, Davorka Čaplinski, Osman Brka, Momčilo Novaković, Velimir Jukić, Ruža Stojanović, Mladen Potočnik i Ranko Šakota.

Nakon rasprave o ovoj tački dnevnog reda, prisutni su sa 10 glasova ZA i 1 glasom SUZDRŽAN usvojili

#### ZAKLJUČAK I

Komisija za finansijske i administrativne poslove Doma naroda i Administrativna komisija Predstavničkog doma Parlamentarne skupštine Bosne i Hercegovine upozoravaju Vijeće ministara BiH da je ušlo u njihovu nadležnost, te da je Odluku o utvrđivanju visine regresa za 2005. donijelo kao neovlašten organ.

Komisija za finansijske i administrativne poslove Doma naroda i Administrativna komisija Predstavničkog doma Parlamentarne skupštine Bosne i Hercegovine smatraju da navedena odluka nije donesena u skladu s zakonom s obzirom da pravni osnov na koji se poziva Vijeće ministara BiH u navedenoj odluci ne stoji.

#### ZAKLJUČAK II

Komisija za finansijske i administrativne poslove Doma naroda i Administrativna komisija Predstavničkog doma Parlamentarne skupštine Bosne i Hercegovine upozoravaju Vijeće ministara BiH da je dužno kao predlagač zakona pratiti, usaglašavati i predlagati izmjene i dopune zakona s ciljem postizanja usklađenosti zakonodavstva Bosne i Hercegovine i izbjegavanja zakonskih nejasnoća, pravnih praznina i sl.

**AD-7.** Uvodno izlaganje o ovoj tački dnevnog reda dala je Ruža Stojanović. Nakon toga za riječ se javila Mubera Ušanović koja je obrazložila razloge zašto je bila suzdržana pri glasanju, a u vezi s tačkom AD-6. Kao osnovni razlog navela je da zaključci koji su predloženi u vezi s ovom tačkom dnevnog reda, po njenom mišljenju, nisu oni koje je donijela Administrativna komisija Predstavničkog doma Parlamentarne skupštine Bosne i Hercegovine kad je razmatrala odgovor Vijeća ministara BiH.

Nakon ovog obrazloženja otvorila se rasprava o tački AD-7 u kojoj su učestvovali: Simo Janković, direktor Službe za zajedničke poslove institucija BiH, Jadranko Tomić, Osman Brka i Branka Todorović.

Prisutni su nakon rasprave o ovoj tački dnevnog reda jednoglasno usvojili

**a) Prijedlog Odluke o izmjenama i dopunama Odluke o utvrđivanju kompleksa zgrada i zemljišta za smještaj institucija Bosne i Hercegovine, o njihovom statusu, uvjetima i načinu korištenja koji glasi:**

Na osnovu člana IV. 4. e) Ustava Bosne i Hercegovine, Parlamentarna skupština Bosne i Hercegovine na sjednici Predstavničkog doma, održanoj \_\_\_\_\_ godine, i sjednici Doma naroda, održanoj \_\_\_\_\_ godine, donijela je

**Odluku**  
**o izmjenama i dopunama Odluke o utvrđivanju kompleksa zgrada i zemljišta za smještaj**  
**institucija Bosne i Hercegovine, o njihovom statusu, uvjetima i načinu korištenja**

**I**

U Odluci o utvrđivanju kompleksa zgrada i zemljišta za smještaj institucija Bosne i Hercegovine, o njihovom statusu, uvjetima i načinu korištenja ("Sl. glasnik BiH", br. 12/99) tačka IV mijenja se i glasi:

"Zgrada s pripadajućim zemljištem iz tačke II stav 1. ove odluke služit će za smještaj Parlamentarne skupštine Bosne i Hercegovine i njenih službi koja će je koristiti i njome upravljati.

Zgrada s pripadajućim zemljištem iz tačke II stav 2. ove odluke služit će za smještaj Vijeća ministara Bosne i Hercegovine i njegovih službi, ministarstava Bosne i Hercegovine, agencija i drugih institucija Bosne i Hercegovine koji će je koristiti i njome upravljati.

U zgradu iz stava 2. ove tačke bit će smještene i sve ostale institucije Bosne i Hercegovine utvrđene Ustavom Bosne i Hercegovine, zakonima Bosne i Hercegovine i odlukama nadležnih organa institucija Bosne i Hercegovine."

**II**

Tačka V odluke briše se.

**III**

Tačka IX odluke mijenja se i glasi:

"Do završetka rekonstrukcije zgrade iz stava 2. tačke II ove odluke Vijeće ministara Bosne i Hercegovine i njegove službe, ministarstva Bosne i Hercegovine, agencije i druge institucije Bosne i Hercegovine zatečene u zgradi na dan donošenja ove odluke koristit će privremeni smještaj u zgradi Parlamentarne skupštine Bosne i Hercegovine."

**IV**

Ova odluka stupa na snagu osmog dana od dana objavljivanja u "Službenom glasniku BiH."

PSBiH broj: \_\_\_\_\_

Datum: \_\_\_\_\_

S a r a j e v o

Predsjedavajući  
 Predstavničkog doma  
 Parlamentarne skupštine BiH

Predsjedavajući  
 Doma naroda  
 Parlamentarne skupštine BiH

## OBRAZLOŽENJE

### I-USTAVNI OSNOV

Ustavni osnov za donošenje Odluke o izmjenama i dopunama Odluke o utvrđivanju kompleksa zgrada i zemljišta za smještaj institucija Bosne i Hercegovine, o njihovom statusu, uvjetima i načinu korištenja sadržan je u članu IV. 4. e) Ustava Bosne i Hercegovine.

Članom IV. 4. e) Parlamentarna skupština ovlaštena je da odlučuje o ostalom što je potrebno za obavljanje njenih dužnosti ili dužnosti koju na nju međusobnim dogovorom prenesu entiteti.

### RAZLOZI ZA DONOŠENJE ODLUKE O IZMJENAMA I DOPUNAMA ODLUKE O UTVRĐIVANJU KOMPLEKSA ZGRADA I ZEMLJIŠTA ZA SMJEŠTAJ INSTITUCIJA BOSNE I HERCEGOVINE, O NJIHOVOM STATUSU, UVJETIMA I NAČINU KORIŠTENJA

Razlozi za donošenje odluke o izmjenama i dopunama Odluke o utvrđivanju kompleksa zgrada i zemljišta za smještaj institucija Bosne i Hercegovine, o njihovom statusu, uvjetima i načinu korištenja sadržani su u činjenici da dosadašnja rješenja upravljanja zgradom nisu dala odgovarajuće rezultate, a posebno kad se radi o implementaciji tačke V. navedene Odluke jer se pri sporazumnom raspoređivanju prostora ne poštuju potrebe Parlamentarne skupštine Bosne i Hercegovine tako da su još uvijek neki klubovi poslanika bez klupskih prostorija. Poslanicima koji su na profesionalnom radu u Parlamentarnoj skupštini Bosne i Hercegovine nisu stvoreni radni uslovi jer nemaju kancelarije za rad, pa su Komisije odlučile da predlože izmjene i dopune Odluke o utvrđivanju kompleksa zgrada i zemljišta za smještaj institucija Bosne i Hercegovine, o njihovom statusu, uvjetima i načinu korištenja.

Već duže vrijeme javlja se i problem liftova, ulaznih vrata i dr., a na intervencije korisnika zgrade ne daju se adekvatni odgovori, pa je to bio još jedan od razloga da se Komisije opredijele za izmjene i dopune navedene Odluke.

U skladu s odredbama člana 3. i 16. Zakona o Državnoj agenciji za istrage i zaštitu ("Sl.glasnik BiH", br. 27/04), fizička i tehnička zaštita osoba, objekata i druge imovine, zaštićene po ovom zakonu, u nadležnosti je SIPA-e.

Tačka V. briše se s obzirom da se predlažu bitne promjene tačke IV. s kojom je tačka V. u vezi, pa iz tih razloga nema više osnova za njeno postojanje.

Iz navedenih razloga Komisije smatraju da je potrebno pristupiti izmjenama i dopunama Odluke o utvrđivanju kompleksa zgrada i zemljišta za smještaj institucija Bosne i Hercegovine, o njihovom statusu, uvjetima i načinu korištenja.

### FINANSIJSKA SREDSTVA

Za provođenje ovih izmjena i dopuna *nije* potrebno osigurati finansijska sredstva u Budžetu institucija Bosne i Hercegovine.

## IZVOD

**iz odredbi Odluke o utvrđivanju kompleksa zgrada i zemljišta za smještaj institucija Bosne i Hercegovine, o njihovom statusu, uvjetima i načinu korištenja**

### Tačka IV

"U zgrade iz tačke II ove odluke bit će smještene institucije Bosne i Hercegovine i to: Parlamentarna skupština Bosne i Hercegovine i njene službe, Predsjedništvo Bosne i Hercegovine i njegove službe, Vijeće ministara Bosne i Hercegovine i njegove službe, ministarstva Bosne i Hercegovine, agencije i druge institucije Bosne i Hercegovine.

U zgrade iz tačke II ove odluke bit će smještene i sve ostale institucije Bosne i Hercegovine ustanovljene Ustavom Bosne i Hercegovine, zakonima Bosne i Hercegovine i odlukom nadležnih tijela institucije Bosne i Hercegovine."

### Tačka V

"Raspored prostorija i smještaj institucija iz tačke IV stav 1. ove odluke izvršit će se sporazumno u roku od 15 dana od dana donošenja ove odluke."

### Tačka IX

"Vanjsko osiguranje zgrade iz tačke II ove odluke i prostor oko zgrade vršit će nadležni organi oba entiteta u skladu sa postignutim sporazumom."

**AD-8** Uvodno izlaganje o ovoj tački dnevnog reda dala je Ruža Stojanović. U raspravi su učestvovali: Mladen Potočnik, Mustafa Pamuk, Momčilo Novaković i Goran Milojević.

S obzirom da se nakon provedene rasprave većina diskutiranih izjasnila da je zahtjev za preispitivanje člana 52. Pravilnika o načinu i uslovima korištenja internih i eksternih usluga - reprezentacije, PTT usluga, službenog vozila, službene odjeće, štampe i stručne literature u Parlamentarnoj skupštini Bosne i Hercegovine nejasan, predsjedavajuća sjednicom pozvala je prisutne da se glasanjem izjasne o njemu. Protiv zahtjeva glasalo je 8 članova, dok su 3 člana glasala "za" zahtjev. Na osnovu navedenih rezultata glasanja, prisutni su većinom glasova donijeli

## ZAKLJUČAK

Komisija za finansijske i administrativne poslove Doma naroda i Administrativna komisija Predstavničkog doma Parlamentarne skupštine Bosne i Hercegovine zaključile su da se ne može prihvatiti Zahtjev poslanika Nikole Špirića za preispitivanje odredbe člana 52. Pravilnika o načinu i uslovima korištenja internih i eksternih usluga – reprezentacije, PTT usluga, službenih vozila, službene odjeće, štampe i stručne literature u Parlamentarnoj skupštini Bosne i Hercegovine zbog nejasnog prijedloga odredbi za dogradnju navedenog člana.

### **Ad-9 a)-Razmatranje isplate naknade troškova mobitela za vrijeme korištenja godišnjeg odmora;**

Uvodno izlaganje o ovoj tački dnevnog reda dala je Ruža Stojanović. U raspravi su učestvovali: Senija Kapetanović, Osman Brka, Velimir Jukić, Jadranka Korać, koja je dala dodatno obrazloženje uz zahtjev, Mladen Potočnik i Mustafa Pamuk.

Zahtjev da se za vrijeme godišnjeg odmora ne isplaćuje naknada za korištenje mobilnog telefona odbijen je sa 9 glasova "za", a jedan član odbio je da se izjasni o ovom zahtjevu iz principijelnih razloga. Prisutni su o ovom zahtjevu jednoglasno izrazili

## MIŠLJENJE

Administrativna komisija Predstavničkog doma i Komisija za finansijske i administrativne poslove Doma naroda Parlamentarne skupštine Bosne i Hercegovine smatraju da se ne može prihvatiti prijedlog sekretara Zajedničke službe da se za mjesec august 2005. godine ne isplaćuje naknada za korištenje mobilnog telefona s obzirom da poslanici koji to pravo ostvaruju zbog potrebe posla koriste mobilne telefone u službene svrhe i u vrijeme godišnjih odmora.

### **b) Zahtjev za odobrenjem kupovine poklona;**

Uvodno izlaganje uz ovu tačku dnevnog reda dala je predsjedavajuća sjednice Ruža Stojanović. U raspravi su učestvovali Goran Milojević i Osman Brka. Nakon završetka rasprave prisutni su jednoglasno donijeli

## ODLUKU

o kupovini poklona iznad vrijednosti utvrđene Odlukom o poklonima, broj: 01/7-011-857-4/01 i broj: 02/3-011-38/02 od 16.1.2002. godine

## I

Administrativna komisija Predstavničkog doma i Komisija za finansijske i administrativne poslove Doma naroda Parlamentarne skupštine Bosne i Hercegovine odobravaju kupovinu poklona iznad vrijednosti utvrđene članom 2. Odluke o poklonima, broj: 01/7-011-857-4/01 i broj: 02/3-011-38/02 od 16.1.2002. godine, koji će biti uručen predsjedniku Parlamenta Kraljevine Norveške zbog njegovog doprinosa razvoju međuparlamentarne saradnje i donacije norveškog parlamenta za rekonstrukciju Velike sale u Parlamentarnoj skupštini Bosne i Hercegovine.

## II

Predsjedniku Parlamenta Kraljevine Norveške stručne službe Sekretarijata Parlamentarne skupštine Bosne i Hercegovine kupit će poklon uz saglasnost predsjedavajuće Administrativne

komisije Predstavničkog doma i predsjedavajuće Komisije za finansijske i administrativne poslove Doma naroda Parlamentarne skupštine Bosne i Hercegovine.

### III

Za realizaciju ove odluke zadužuje se sekretar Zajedničke službe Sekretarijata Parlamentarne skupštine Bosne i Hercegovine.

### IV

Odluka stupa na snagu danom donošenja.

#### c) Pitanje odijevanja u Parlamentarnoj skupštini Bosne i Hercegovine;

Ovo pitanje pokrenuo je Osman Brka koji je na sjednici dao i obrazloženje. Pošto je informiran da je ovo pitanje uređeno Pravilnikom o načinu i uslovima korištenja internih i eksternih usluga - reprezentacije, PTT usluga, službenog vozila, službene odjeće, štampe i stručne literature u Parlamentarnoj skupštini Bosne i Hercegovine, kojim je utvrđena obaveza sekretara da paze na odijevanje zaposlenih, daljnje rasprave nije bilo.

#### d) Rad na dane državnih praznika;


Ovo pitanje pokrenuo je Branko Zrno koji je na sjednici ponovo dao obrazloženje razloga za pokretanje ovog pitanja. S obzirom da se ovo pitanje na zajedničkim sjednicama pokreće već nekoliko puta Senija Kapetanović i Ruža Stojanović predložile su da na njega stručne službe Sekretarijata Parlamentarne skupštine Bosne i Hercegovine pismeno odgovore Branku Zrni, odnosno riješe pitanje imenovanog u skladu sa zakonom. Prijedlog je jednoglasno prihvaćen. Za njegovu realizaciju prisutni su zadužili sekretara Komisija i Jadranku Korać.

Pošto je iscrpljen dnevni red, jedanaesta zajednička sjednica Komisije za finansijske i administrativne poslove Doma naroda i Administrativne komisije Predstavničkog doma Parlamentarne skupštine Bosne i Hercegovine završena je u 16,00 sati.

Sastavni dio ovog zapisnika je transkript 11-e zajedničke sjednice Komisije za finansijske i administrativne poslove Doma naroda i Administrativne komisije Predstavničkog doma Parlamentarne skupštine Bosne i Hercegovine, održane 14.9.2005. godine.

Sekretar  
Administrativne komisije  
Predstavničkog doma  
Davorica Čaplinski

Predsjedavajuća  
Komisije za finansijske i administrativne poslove  
Doma naroda  
Ruža Stojanović



Predsjedavajuća  
Administrativne komisije  
Predstavničkog doma  
Senija Kapetanović

